




序

同治四年冬恪靖伯少保左公寵定東南之亂聚粵寇  
嘉應殲焉明年春全師凱旋閩中武備久弛吏治失修  
公還銳意興復以創爲因不數月百度維新秩秩咸理  
頑廉懦立風俗一變其年秋

天子以西陲師久無功

詔公提得勝師移督陝甘行次漢陽得

旨佩欽差大臣印兼節制兩省兵平賊向讀歐陽文忠  
外制集序敘慶歷之際朝廷信任韓范二公入則參知

政事出則經略邊陲許爲聖賢相遭萬世一遇以今方之又豈有異哉方公之西也大春適奉

命權提福建陸路軍事而公又以損兵益饟事懃懃相屬致不果從回憶辛酉壬戌之交全浙河決魚爛時公以太常卿督師先埽平江皖乃移軍三衢旣乃被巡撫  
湘江之

命大春正以浙事奉

嚴旨褫職待對簿於衢公以嚴州士民之請爲上於

朝俾効力行間以贖前負自後大軍規金嚴規甯紹規

杭湖每戰皆捷大春率一旅之師無不皆從列郡珠還  
鐫級洊復起罪廢之餘其獲有今日者公一人力也故  
每讀當時薦牘感

朝廷棄瑕錄用格外矜全與公爲國憐才維持調護苦  
衷輒令人且感且泣盡然不知涕之從落也浙事旣平  
餘燄熾聞廣交公聞警先以三路兵分水陸倍道赴援  
自帥中軍繼之十餘年劇寇是役草薶禽獮幾於無有  
予遺所漏網者汪海洋之黨而已及公節制三省之  
命下首定長圍困賊之策以爲一鼓成禽計鮑提督超

者宿將也向提數萬眾獨當一面以善戰名汀楚間聞公大舉深入自上疏請以所部聽指揮於此見公用兵之神一時名將傾倒敬服類如此又奚怪乎旌旄所指迅奏膚公偶有緩急

廟堂之上輒相需如左右手也在公忠誠貫日月義氣薄雲漢苟利國家外此百所弗計故雖兵間積苦從未嘗以况瘁形於詞色窮冬苦寒風雪交作窮廬積霰高與身等公擁緇布絮裘據白木案手披圖籍口授方略自晨至於日昃矻矻不少休縱軍事旁午官書山積亦

必一一省治最下裨校寸稟尺牘皆手自批答示其要  
領蓋公之忠勤本出性生而天賦精神才力又足以副  
之以大春所見其刻苦往往有窮措大所不能堪者而  
公處之晏如也然在局外觀之終不能無耿耿耳矧夙  
蒙國士之知如大春者乎間得西來消息聞同揔交訂  
戎事孔棘則惄然以憂蹶然而起深夜披衣以興往往  
至於三四及王師屢捷好音迭來則又不禁心焉以喜  
出門西望听然而笑仿佛置身百二山河間聽壯士長  
歌入四扇潼關也究其憂喜之端自亦有莫測其故者

待罪於茲忽忽三載疆圉無事金革不興治兵之暇稍  
及文事因出公生平奏議而卒讀之庸自課焉其在張  
駱兩大司馬幕所著湘中兩湖二稿已刊諸福州矣集  
同治紀元已後訖丙申秋得廿八卷謀壽諸梨棗以廣  
其傳幕下客徐都司葆齡雅究心於古人之文嘗謂輓  
近章疏膚淺俚俗去古彌遠唐宋以奏議名家者首推  
陸宣公蘇文忠觀其所上萬言書疏牋表劄子非不敷  
陳時務條其利病其引古也經經而緯史文而不流於  
迂其論事也剴切而詳明質而不流於俗以古人之筆

行今人之文不懈而入於古求之當代大人先生某得  
二人焉一則大中丞幼丹沈公其一則左公也蓋沈文  
如懸崖峭壁蹊逕獨別其妙處得古人之高而公文則  
長江大河一波未平一波復起其妙處得古人之大不  
知者以公功在社稷名列旂常疑其文章或爲勲業所  
揜要之珠光劍氣固各有不可磨滅者在也粹而行之  
固夙被思知者所宜有事亦使後世讀公之書得以想  
見公之爲人而公頻年馳驅戎馬衝犯鋒鏑一片忠君  
愛國之懷亦遂昭然顯揭於天壤之間豈不偉哉豈不

偉哉大春隨其言因卽屬以編校之役始丁卯秋九月  
六閱月而剞劂者以訖工告既喜燦然成帙有以公諸  
同好而垂示永永也其敢以不文辭而遂嘿嘿已乎夫  
公以名孝廉起家戎幕抱不世出之才會國家多事之  
秋不十年位躋封疆任隆師保分茅胙土異數酬庸可  
謂極千古文人之榮遭際之隆所謂韓范者或威名事  
業堪與相埒而君臣之際疑謗交乘旋用旋已在歐公  
推崇本朝措詞不得不爾以云一德之盛則實乎遠矣  
粵寇金田倡亂流毒海內垂二十年

朝廷宵旰憂勤命將出師力痛財殫天下之大已漸成  
瓦解土崩之勢以視韓范當日所處難且十倍自楚軍  
出兵威日振寇讎因之日衰凡以三澗七澤之雄得名  
行間其後秉鉞登壇經略數省豐功偉烈至今赫赫照  
人耳目者不一而足要皆公贊襄帷幄所汲引提挈爲  
多蓋楚軍之用舍實粵寇成敗盛衰一大關鍵惟楚有  
材得以空羣竭澤畢出以供國家之用卒收東南糜爛  
之局又公一人實爲之關鍵觀人當於其大然則謂粵  
寇之平始終皆公一人力焉可也彼拘墟者囿於一隅

之見震於目前之功其又烏足與語公之深哉集成輒  
書所見弁諸簡端以質海內之讀公書者若夫行文之  
法固未知其於行兵何如若仍不外乎奇正變化從衡  
離合虛實擒縱之奇照應起伏之妙則大春觀公行文  
之日久矣雖陸蘇復生政恐未必多讓同治七年歲次  
戊辰花朝後十日署福建陸路提督提督銜福甯鎮總  
兵官衝勇巴圖魯舊部黔中羅大春謹序

恪靖奏稿初編卷一目錄

督辦浙江軍務據探省城失守現辦情形摺

請催調各路營勇來浙亟迅發捐輸部照片

請速令劉總兵募勇來衢設立水師署衢鎮片

補授浙江巡撫謝恩摺

奏官軍由徽入浙三獲大捷衢屬開化肅清摺

覆奏駐軍開化馬金街正可兼顧衢城摺

附奏官軍入浙應設糧臺轉運接濟片

叙保軍中尤爲出力文員以資臂助片

請迅敕催調所知各員速來軍前差委片

督辦浙江軍務據探省城失守現辦情形摺

奏爲遵

旨督辦浙江軍務現據探報浙江省城失守敬陳辦理情形恭摺奏祈

聖鑒事竊

臣

於十一月二十六日江西廣信營次准兩

江督

臣

曾國藩恭錄咨會兵部火票遞到咸豐十一年

十月十八日內閣奉

上諭欽差大臣兩江總督曾國藩著統轄江蘇安徽江西三省并浙江全省軍務所有四省巡撫提鎮以下各

官悉歸節制浙江軍務著杭州將軍瑞昌幫辦并著曾國藩速飭太常寺卿左宗棠馳赴浙江剿辦賊匪浙省提鎮以下各官均歸左宗棠調遣欽此同日欽奉

上諭前因浙江情形喫緊奉

旨令左宗棠統帶所部剋日援浙旋經曾國藩覆奏以左宗棠方回救西路未能分身須俟湖北江西攻剿得手或安慶克復再與左宗棠力謀援浙茲據瑞昌王有齡奏江皖攻剿得手浙省賊勢披猖請飭左宗棠督辦浙江軍務等語逆首李秀成大股及江西湖坊等賊盡

驅入浙加以僞侍王李世賢大股盤踞金華一帶現已  
攻陷嚴州府城及浦江義烏東陽餘杭新城等縣勢必  
直撲省城旁竄甯紹幾於全浙糜爛浙省不保則金陵  
蘇常甯廣之賊得以進退自如且徽州廣信必遭肆擾  
其害曷可勝言本日已明降諭旨令曾國藩節制浙江  
全省軍務並令江蘇安徽江西浙江巡撫提鎮以下各  
官悉歸節制該大臣自不能不統籌兼顧況安慶已經  
克復湖北江西軍情亦有起色將次肅清自不至有顧  
彼失此之虞著曾國藩卽飭左宗棠帶領所部兼程赴

浙督辦軍務浙省提鎮以下統歸調遣迅奏膚功以圖  
挽救東南大局左宗棠入浙之後所需糧餉軍火浙江  
力難猝辦著毓科先行籌撥銀十萬兩解交應用於浙  
江代墊江西援軍口糧項下如數劃還並著慶端瑞璜  
按月籌銀十萬兩同軍火等項一併源源接濟毋許遷  
延推諉致誤事機欽此又同日准兵部火票遞到議政  
王軍機大臣字寄咸豐十一年十月廿三日奉

上諭浙省待援孔亟急盼左宗棠一軍迅速趕到方能  
挽救大局著曾國藩仍遵前旨迅飭左宗棠帶領所部